

**PRAVOSUDNA KOMISIJA
BRČKO DISTRIKTA
BOSNE I HERCEGOVINE**

Broj: SuPK-138/01
Brčko, 13.07.2001.godine

Na osnovu člana 12 stav 1 tačka 18 Zakona o pravosudnoj Komisiji Brčko Distrikta Bosne i Hercegovine ("Službeni glasnik Brčko Distrikta BiH" broj 4 od 28.09.2000 godine), Pravosudna komisija Brčko Distrikta Bosne i Hercegovine na svojoj sjednici održanoj dana 13.07.2001.godine donijela je slijedeći

P R A V I L N I K

O USLOVIMA ZA OBAVLJANJE POSLOVA VJEŠTAČENJA

Član 1

Ovim Pravilnikom utvrđuju se poslovi koje moraju ispunjavati fizička i pravna lica koja u sudskom, upravnom i prekršajnom postupku vrše poslove vještačenja, opšte uslove za osnivanje preduzeća za vršenje poslova vještačenja i njihova prava i dužnosti.

Član 2

Ovlaštenje za vršenje poslova stalnog vještaka može se dati licu koje pored opštih uslova za zasnivanje radnog odnosa u državnom organu ispunjava i slijedeće posebne uslove:

1. Da ima potrebno stručno znanje i sposobnost za davanje nalaza i mišljenja u određenim vrstama vještačenja,
2. Da je po svojim radnim i ljudskim kvalitetima dostojno za rad u svojstvu stalnog vještaka i da se može očekivati da će vještačenje obavljati istinito, objektivno, uredno i na vrijeme.

Uslove iz tačke 1 prethodnog stava ispunjava lice koje ima najmanje odgovarajuću Višu stručnu spremu ili je visokokvalifikovani radnik sa radnim iskustvom potrebnim za samostalan rad.

Član 3

Stalni vještaci koji raspolažu naučnim, tehničkim ili sličnim stručnim znanjem dobijaju odobrenje za rad od predsjednika sudova nakon što dokažu da raspolažu znanjem, vještinama, iskustvom i obrazovanjem.

Član 4

Predsjednik Apelacionog suda Brčko Distrikta BiH postavlja stalne vještake po službenoj dužnosti na inicijativu, predsjednika Osnovnog suda Distrikta, javnog tužioca Distrikta, direktora Kancelarije za pravnu pomoć Distrikta, državnog organa preduzeća i drugih pravnih lica, a uz prijedlog se prilaže izjava predloženog lica o pristanku za postavljenje.

Zainteresovano lice može pokrenuti inicijativu organima iz stava 1 ovog člana radi utvrđivanja prijedloga za postavljanje stalnog vještaka.

Pravosudna komisija Brčko Distrikta BiH može objaviti javni poziv za obavljanje poslova vještačenja pred pravosudnim organima Brčko Distrikta BiH.

U objavljenom javnom pozivu navest će se rok u kojem se vještaci mogu javiti, akoji ispunjavaju uslove iz člana 3 ovog Pravilnika.

Član 5

Inicijativa za postavljanje stalnog vještaka podnosi se predsjedniku Apelacionog suda Brčko Distrikta BiH na čijem području lice ima prebivalište.

Državni organ, preduzeća i druga pravna lica dužni su uz inicijativu podnijeti dokaze da su ispunjeni uslovi iz člana 2. ovog Pravilnika.

Predsjednik Apelacionog suda prije utvrđivanja prijedloga za postavljanje stalnog vještaka pribavit će mišljenje o radnim, stručnim i ljudskim kvalitetima od sudova gdje su se ranije pojavljivali u svojstvu vještaka, biografije vještaka, te sa istima obaviti razgovor kako bi dobili odobrenje za rad, a nakon toga uvesti ih u listu vještaka.

Član 6

Sudovi i drugi organi mogu za vještaka u odredjenim slučajevima koji nalažu hitnost odrediti lice koje nije postavljeno za stalnog vještaka, a koji ispunjava uslove iz člana 2. ovog Pravilnika.

Član 7

Stalni vještaci imenuju se na period od četiri godine i po isteku tog perioda mogu biti ponovo imenovani.

Protiv odluke kojom se zahtjev za imenovanje sudskog vještaka odbija, podnosilac zahtjeva ima pravo žalbe Pravosudnoj komisiji Brčko Distrikta BiH u roku od 15 dana od dana prijema odluke.

Prijedlog za pokretanje postupka za razrješenje stalnog vještaka mogu podnijeti predsjednik Apelacionog suda i Osnovnog suda Brčko Distrikta, javni tužilac Brčko Distrikta, direktor Kancelarije za pravnu pomoć, sudije i stranke u postupku.

Stalni vještak razrješit će se dužnosti stalnog vještaka ako se utvrdi da nije ispunjavao uslove da bude postavljen za vještaka, ako se utvrdi da više ne ispunjava neke od uslova iz člana 2. ovog Pravilnika i ukoliko se utvrdi da nesavjesno i nestručno obavlja svoju dužnost.

Stalni vještak razrješit će se dužnosti i ukoliko sam to zatraži.

Član 8

Rješenje o razrješenju stalnog vještaka donosi predsjednik Apelacionog suda Brčko Distrikta BiH.

Razrješeni stalni vještak briše se iz spiska vještaka.

Protiv rješenja o razrješenju, razriješeni vještak ima pravo žalbe Pravosudnoj komisiji Brčko Distrikta BiH u roku od 15 dana od dana prijema odluke.

Član 9

Pravosudna komisija Brčko Distrikta BiH vodi evidenciju postavljenih stalnih vještaka za područje Brčko Distrikta BiH.

U evidenciju se unose slijedeći podaci: redni broj upisa, ime i prezime, ime jednog roditelja, zanimanje i adresa stanovanja, broj i datum rješenja o postavljenju i broj i datum rješenja o razrješenju stalnog vještaka.

Član 10

Brčko Distrikt BiH može osnovati organizaciju za vršenje poslova vještačenja kao poslova od posebnog interesa.

Član 11

Organizacija za vještačenje pored oslova za vještačenje provodi stručno usavršavanje radnika i drugih lica koja obavljajuposlove vještačenja, saradjuje sa sudovima i drugim organima radi unapredjenja vršenja poslova vještačenja iprati naučna i tehnička dostignuća od značaja za vještačenje.

Član 12

Saglasnost na Statut za vještačenja i za imenovanje organa upravljanja daje Skupština Distrikta BiH.

Član 13

Poslove vještačenja mogu obavljati stručne i druge ustanove (fakulteti, instituti, zavodi i dr.), koji su u okviru svoje djelatnosti predvidjeli i obavljanje poslova vještačenja i kao takve upisane u sudski registar, kao i državni organi ako raspolažu odgovarajućim stručnim kadrovima i tehničkim sredstvima.

Član 14

Stručni radnici organizacije za vještačenje, stručne i druge ustanove ili državnog organa kao i lica koja za njihov račun vrše vještačenje, moraju ispunjavati opšte i posebne uslove koji su ovim Pravilnikom propisani za vršenje poslova stalnog vještaka.

Stručni radnici i lica iz prethodnog stava samostalni su u vršenju vještačenja, a u pogledu čuvanja tajni, odgovornosti za istinitost datog naloga i mišljenja, dužnosti odazivanja na poziv suda i organa upravljanja, imaju iste dužnosti kao i lica upisana u spisak stalnih vještaka.

Član 15

Organizacija za vještačenja i ustanove iz člana 13. ovog Pravilnika prije upisa u sudski registar, dužne su pribaviti mišljenja Pravosudnoj komisiji Brčko Distrikta BiH o osposobljenosti stručnim kadrovima i tehničkim sredstvima za vršenja poslova vještačenja.

Član 16

organizacija za vještačenja koja je registrovana, dostavit će akt o osnivanju, odnosno rješenje o upisu u sudski registar predsjedniku Apelacionog suda Brčko Distrikta BiH.

Član 17

Organizacija za vještačenja, stručna ili druga ustanova ili državni organ iz člana 13. ovog Pravilnika dostavljaju pismeni nalaz i mišljenje potpisanog lica koja su izvršila vještačenje. pored potpisa naznačit će se zanimanje, stručna sprema i specijalnost vještaka koji su izvršili vještačenje.

Član 18

Povjereno vještačenje stručnoj ili drugoj ustanovi ili državnom organu ove organizacije, ova organizacija i organi dužni su izvršiti vještačenje, ako predmet vještačenja spada u njihovu djelatnost i ako imaju stručne kadrove i druge potrebne uslove.

Član 19

Za izvršene usluge vještačenja zavisno od vrste vještačenja stalnom vještaku, organizaciji za vještačenje i ustanovama iz člana 13. ovog Pravilnika, pripada nagrada i troškovi za njihov rad.

Nagrada se određuje, zavisno od vrste i težine vještačenja u iznosima od _____ .

Član 20

Popis pravnih lica koja obavljaju vještačenje i stalnih sudskih vještaka objavljuje se u “Službenom glasniku Brčko Distrikta BiH”.

Član 21

Ovaj Pravilnik stupa na snagu osam dana nakon objavljivanja u “Službenom glasniku Brčko Distrikta BiH”.

**PRAVOSUDNA KOMISIJA
BRČKO DISTRIKTA BIH**

**P R E D S J E D N I K
NADA MAJINOVIĆ**